

10
MARTINI WARREN

Ad AMICUM

EPISTOLA.

IN QUA

CURANDI METHODUS,

ET

RATIO in FEBRIBUS

Nuper grassantibus,

Corticis Peruviani Periculum,
Incertitudo & Infalubritas,

Breviter explicatur.

EDITIO ALTERA.

CANTABRIGIÆ:

TYPIS ACADEMICIS.

Prostant Venales apud G. THURLBOURN Bibliop. Cantabr.
G. INNYS & R. MANBY in Area Occidentali D. Pauli,
& C. RIVINGTON in Cœmiterio D. Pauli. 1740.

MANITOU MOUNTAIN

ALBERTA

REPORT

IN

THE

PROVINCE

OF

ALBERTA

AND

THE

REPORT

OF

THE

PROVINCE



R. L.

Viro Doctissimo

MED. STUDIO SO

MARTINUS WARREN

S. P. D.



ANDEM tibi (Vir Amicissime) dato scribendi otio fidem libero, & sententiam nostram de Corticis Peruviani usu & abusu, Curandique Methodum & Rationem, quam in Febris nuper grassantibus institui, tibi fusius exponam, at ea tamen quae Epistolae convenit brevitatem.

A

NEMINEM

NEMINEM in Aegris tractandis vel mediocriter versatum fugere potest, Febres hujusce & elapsi anni Versatilis esse & Incerti Genii; Corticemque Peruvianum ab illâ, qua olim polluit, sanandi vi & certitudine prorsus descivisse, atque ex liberaliori ejus usu (praesertim praematurius exhibiti) malorum mille & pessimi moris Symptomata exinde profluxisse.

MIHI (quantum potui) diligenter horum Causam exploranti visum est aliam prorsus & inusitatam, quam mihi mea suggessit ratio, tentare viam, quae sine Pulveribus, sine Haustibus *salinis*, quos (si mihi fas sit libere quae sentio effari) vix aut ne vix quidem unquam profecisse vidi; quae sine longâ istâ & numerosâ Medicamentorum farragine morbum sine Recidiva prorsus confoderet.

PRIMO itaque notandum, quod ab omnibus uti reor in confesso est, Corticem inducias potius Morbo impetrare quam eundem debellare; Materiamque febrilem, quae propelli debuerat, tanquam hostem intra moenia inclusum, nisi Corticis usus debitis intervallis

vallis repetatur, certo certius novos daturam esse Tumultus.

A Cortice ergo tanquam inertī nimis Medicina, nisi summa urgeat necessitas, prorsus abstinendum, aliamque medendi rationem instituendam censeo, quae materiam istam omnino eliminēt, quaeque plus habeat *Certitudinis*, minus autem & *Fastidii* & *Morae*.

QUID autem illud efficacius praestare potest quam purgatio, quae stimulo quodam Intestinorum tunicas irritando foecum Sarcinam extrudat, Naturamque nimio oppressam pondere relevet, quā solā Orgasmus per id temporis desaeuens tuto sedetur, & vitiatæ Morbi Particulæ confestim e Corpore exulent? Et si quis ea quae de Purgantibus differuit *Jos. Friend* (Vir disciplinā omni, praesertim Medica instructissimus, cui parem aut in Aegris tractandis humaniorem aut faeliciorem non Aetas superior dedit nec dabit posterā) Si quis quid de Febribus *Lommius*, quid *Bellini*, quid *Sydenhamus* noster scripsere, cura vel levissima evolvit, vel mente vel oculis privetur necesse est, si non persentiscat, quan-

tum in his praesertim Febribus conferat adjuvetque lenioribus Catharticis subinde Alvum exonerare.

NEQUE est cur me quispiam justo audacior pronunciet, eo nimirum nomine quod Clarissimum Sydenhamum nostrae medendi rationi adstipulantem laudavissem; cum sedulo lectori facile constabit, illum monuisse, ne Catharsin aggrediamur, nisi Febre prorsus depulsâ; Ex eo quod exinde ^a Morbus *altiores radices agat & pertinacius stationem suam tueatur.*

^b NEQUE Catharsi, multo minus Venaesectione Subducenda est Materiae Febrilis Pars aliqua, quo liberius Cortex suo fungatur munere, ex eo quod promptius & certius recrudescent Paroxysmi.

QUID quaeris habeo quod reponam? Est mihi fane Religio tam eruditos Manes inquinare, tam doctos Cineres polluere: neque id est aut consuetudinis aut naturae meae:

(a) Pag. 98. Edit. 1726. Lugdun. Batav.

(b) Pag. 94.

Verumtamen excusandus fortasse videar, si vel a Rei, quae nunc agitur, Magnitudine, in qua Humani Generis Sanitas versatur, quam ex animo colere voveo, persuaderi me patiar, ut agam paulo liberius.

VERECUNDE igitur regero. Quidni autem amplissimus titubaret Sydenhamus, cum Humanum est aliquando dormitare, aliquando errare?

EHEU! Fugax ergo & labilis multum suspiciendi Viri Memoria; En ipsum Catharticus Obversantem! En eundem, Febres Omnigenas Purgantium auxiliis debellantem!

(1) DE Febre Pestilentiali.] Post Diaphoresin finitam, *sequenti luce Catharticum exhibeo & hac ratione complurimis Febre hac correptis sanitatem restitui, adeo ut ne unus quidem ex eo morbo mihi desideratus sit, postquam hanc exercere inceperam.*

(2) DE Variolis] *Saepe numero Observaverim reiteratam Catharsin sanguine nondum inquinato.*

subsequentes Variolas laudabiles & distinctas ut plurimum reddidisse.

(3) DE Novae Febris Ingressu] Saepe Aeger maxime si Juvenis aut Infans post eductum Sanguinem una Catharsi defunctus statim convalescit; Febre primo purgantis Remedii Impetu expugnata: nonnunquam vero opus est ut ad plures vices Alvus sollicitetur; Quandoque enim, licet id raro evenit, Aegro e Febre jam dicta Methodo liberato, recrudescencia materiae Febrilis post Dies aliquot Morbum postliminio reducere videtur, quem tamen Purgatio quarta vice repetita mox eliminat.

(4) DE Novae Febris Ingressu] Si quando vero Methodus Purgandi laudata Febrem non prorsus tollat, id saltem agit ut intermittere cogatur, ac proinde Peruviano Cortici, qui hic nunquam non triumphat, conficiendum tradit: cum autem Catharsis Curationi obesse nonnullis fore videatur; pro comperto adfirmo, nihil ita certo atque ita potenter Aegrum refrigerare atque Catharsin.

(5) DE Febris Vernalibus] *In Diebus Inter-*
mittentibus per triduum quatrimumve inject-
um Enema saepe Curationem absolvit.

(6) DE Febre Stationariâ] *Vesperis applice-*
tur Epispasticum & sequenti aurorâ Potio leniti-
va praescribatur, quae ad tertiam vicem alter-
nis Diebus repetatur, & hora Somni post Cathar-
sin Haustus pacificus propinetur.

Ex His collatis liquido satis constat illum
 sibi ipsi nonnunquam discrepasse, immo prorsus
 contrarium fuisse, videorque mihi videre illum
 ipsum confitentem Reum & nostrae Mendendi
 rationi ex animo suffragantem—Sed ne
 amplius de tanto viro dicam: in viam redeo.
 Quempiam modo rogatum velim quid est Febris?
 Quid est nisi Naturae Conamen, quo
 quod est hostile sibi amoliri laborat? Quidni
 itaque cum Ipsa suis viribus deficiat, adjutricem
 porrigam manum; quo tendat, comiter ducam;
 Et si sit Impar operi ad vires ejus instaurandas
 & ad onus subtrahendum summâ ope enitar?

DUDUM autem & ab illo tempore hanc

Purgationis Praxin rite celebrandam esse conjectabar; ex quo subolui Febres has Originem duxisse ex Particulis putrescentibus, & Cruditatibus quas Aeris Intemperies & Fructus autumnales in Intestinis & in Sanguine deposuerant.

QUIN etiam pro certo comperi, quoties notandi Occasio obvenit multos ex Invasione Febris Ventriculi nausea & Ventris torminibus misere cruciatis, inter Curationem institutâ Catharsi vel per Os vel per Alvum Vermes in latibulis suis reconditos saepe eiecisse.

NON autem a re alienum erit, nec tibi forsan taedio, Unam vel Alteram e multis Historiam adjicere, quo clarius & plenius innotescat nostra medendi Methodus; & quo manifestius constet, ex solito tramite ipsam me Experientiam deduxisse seu potius abripuisse; cui nemo est qui non majorem Fidem adhibeat quam ullis Doctissimorum hominum disputationibus: Fieri enim potest ut vel Accuratissimus Philosophus in Causarum Investigatione aliquid omittat; cujus tamen non contemnenda

nenda sit Vis in Effectibus producendis, ita ut cum ad Experientiam ventum est, non idem Effectus sequatur, quem Ratiocinium promiserat, cum autem Effectum aliquem, positus quibusdam certis Causis nasci, his sublati non nasci, frequenti & iterata Experientiâ conspiciamus; nullus jam dubitandi Locus relinquitur. Ad Experientiam igitur provoco.

B HISTO-



HISTORIA I^{ma}.

VIR Generosus, quadragenarius, Vino & Liquoribus spirituosus plus aequo deditus, Febre vehementi & continuâ per tres Dies laboravit, nec quicquam Medicamenti, nisi quod Aniculae suasere, sumpsit.

DIE Quarto, Rebus omnibus in deterius ruentibus, me advocari jussit Frater sibi charissimus; Hora circiter tertia postmeridiana in Auxilium veni, quo Tempore ingravescebat Stupor & per Intervalla Delirium; defecit alternatim loquendi & deglutiendi Vis, Pulsus celer, debilis & aliquando intercisus, Urina pallidissima, Musculorum Dolores, Tendinum Subsultus; Hujusmodi aliisque pessimae Indolis Symptomatis correptus jacuit.

E G O

Ego vero Emplastra suppedalia, & Epispastica solito acriora Nuchae, Brachiis & Femoribus internis quamprimum apponenda curavi, & praecepi Bolum ex Confectione Raleighana additis Camphorae gr. *vj*, Superbibendo Haustum Paregoricum, qui per totam fere Noctem placidum conciliavit Somnum.

Quinto mane Mente constitit, visus est & Sibi & Amicis paululum recreari. Hora undecima matutina, Febris mirum in Modum tenuata; Urina Hypostasim deposuit laudabilem; Pulsus tum Viribus valentior tum & Intervallis distinctior, & in melius omnia; nihil itaque nisi Haustum Paregoricum hora Somni repetendum praescripsi, & in Promptu esse Potionem Purgativam sequentem.

R. Tinct. Hier. ʒjss.

Syr. Ros. Solut. ʒvj.

Spt. Lavend. C. ʒss.

M. F. Potio —

Sexto, Multo mane Rebus sic stantibus Potionem praescriptam & subinde Haustulum Seri vinosi sumendum dedi; Ad Meridiem

ter se dejecit Alvus, unde multum Emolumenti, Vesperi Haustum Paregoricum iterum propinandum jussi; ad mediam Noctem rediit Febris & recrudescebant omnia, non autem ea qua prius Vehementia.

Septimo mane sese remisit & intermisit; quocirca Potionem purgativam & alternis Diebus ad tres Vices repetendam praescripsi, quibus peractis sensim inclinavit & evanuit Febris, & sine Recidiva optime & athleticè convaluit Aeger.

ET intra Dierum circiter quadraginta Spatium aegros quinque, aliosque deinde, hac ipsa Methodo tractatos incolumes evasisse Fidem tibi spondeo.

HISTORIA



HISTORIA 2^{da}.

RUSTICUS priori Vicinus, corporis Obesioris, non multo post Tempore elapso, eadem fere Symptomata persensit;

Quarto ab Invasione Curae meae mandatus fuit, & eandem pene adamussim Curationis Methodum institui, impari autem Successu, quater enim repetita est Catharsis, Febriculae tamen adhuc aliquantulum permansit & alternis Diebus rediit; ad Recidivam praecavendam in hunc Modum praecepi.

R. Pulv. Peru el. & recent. 3vj.

Rad. Rhei el.

Cort. Winteran. ā 3j.

Conf. Fracast. S M. 3jss. Syr.

Aurant

Aurant. ℞. S. M. F. Elect. Gijus sumat Q. N. Mosc, majoris tertiis Horis (a Paroxysmo vacuis) superbibendo Haustulum Vini Rubri Aqua reperfata commixti: intra Septimanam pancratice valuit.

HISTORIA

HISTORIA



HISTORIA 3^a.

VIR Doctus (deglutitis licet ex suo etiam Praescripto intra Mensem Corticis ʒiij) multa adhuc Febre fractus intermittente, eaque in Continuum & Hecticam vergente, me consuluit; tunc temporis Tussi, quae Phthisin minitari mihi videbatur, vexatus, ex Sinistra Pleuriticis & Colicis doloribus subinde cruciatus, Purulenta non sine Sanguine exscreavit, difficulter & raro Sedes detrusit.

CUCURBITULAS Cervici, Scapulis & Partibus adjacentibus, ut fluere Sanguis ad ʒx. apponendas esse jussi; & ut.

Bis repetita esset lenior Catharsis, quae quidem Tussi & Doloribus Levamen attulit maximum.

Quo

Quo facto Electuarium praedictum praecepi quarta quaque hora sumendum superbibendo Coch. iiij Apozematis sequentis.

℞ Pulv. Peru el. 3x.

Sal. Absynth. 3j. Coque

Repetitis Vicibus in Aq. font. Q. S. sub Finem Coctionis adde

Bals. Tolutan. 3ij.

Styrac. 3j.

Flor. Benzoin 3ij.

Colaturae 3xij. Adde Aq. Lumbric M. 3iiij.

Syr. Bals.

De Mecon. ā 3jss. M. F. A.

His adhibitis Remediis, post Hebdomadas duas, nihil Sanitati defuit, nisi virium Robur, quod ex Culina brevi faeliciterque instauratum fuit.

HISTORIA



HISTORIA 4^{ta}.

VIR Rusticus, Habitus boni, Annum trigesimum circiter, in Febrem incidit intermittentem, quam vero assumptis ex Pharmacopoei Consilio Corticis 3x. brevi depulit & Sanitatem sibi promisit integram; Nulla autem adhibita Cura ad praeveniendam Morbi Revirescentiam, elapsis duabus tribusve Hebdomadis recrudescebat Febris, eaque continua & mali Moris; intra enim Dies tres Doloribus horrendis, Vigiliis pertinacibus, Spasms, caeterorumque Symptomatum funestissimorum Satellitio stipata fuit. In Auxilium vocatus in hunc Modum praecepi.

APPOSITIS prius Emplastris Epispasticis
Nuchae & Femoribus internis

C

R. Conf.

℞ *Conf. Fracast. S. M. ℥j.*
Pulv. e Chel. C. Comp. ℥ss.
Croc. Anglic.
Cast. Rus. ā gr. v.
Sal. Succin.
 — *C. C. ā gr. iij.*
Conf. Alkerm. q. s. M. F. Bol.

quamprimum sumend. & quarta quaque Hora
 repetend. cum Haustu sequenti.

℞ *Aq. Ceras. Nigr. ℥jss.*
Poeon. C. ℥ij.
Syr. de Mecon. ℥ss.
Sal. Vol. Oleos. gut. xxx. M. F. H.
 ℞ *Emplast. Cephal. ℥iss.*
Epispast.
Galban. Colat. ā ℥ss.
Euphorb. Camphor. Opii ā ℥ij.
Ol. Succin. ℥ij. M. F. Emplast.
S. A. n°. ij plantis pedum tepide admovent.

His peractis, Eheu vero! nequicquam vel ad
 Dolores mitigandos, vel ad Febrem subdoman-
 dam proficientibus, post biduum secundâ Vice
 ad Aegrum invisendum accersitus, cito intel-
 lexi Morbum efferatiùs saevire, & in pejus
 omnia

omnia ruere. Rebus sic stantibus Medicum alterum quemcunque velint in Operam sociam invitandum efflagitavi; Incassum vero. Quid itaque faciendum? Quid Consilii capiendum? Medici pro certo neque boni neque probi est omnem Spem protinus abjicere, & instanti Periculo turpiter cedere. Ne te ergo (Vir erudite) in Rebus arduis de omnia tentando propelli Clamor & Vociferatio deterreat; levis etenim Momenti eorum Lingua procax ex Eventu omnia abjudicantium. Memento vero Diverbii non eo minus Sosпитis, quo magis triti, *Experiri anceps Remedium potius quam nullum.* Apage! Omne illud Famae Detrimentum, & quae Usus probarit seu Ratio dederit, animosè experire, si qua forte sit Salutis instaurandae Via.

ADVOCATIS itaque & de Periculo monitis Amicis, Potionem Catharticam & post Horas duas Enema emolliens injiciendum praecepi, haecque Sorte non iniquâ sed & mirandâ; Mediam ante Noctem ter soluta est Alvus, uti tamen ut satis sint commoda Quietis Intervalla. Finita Operatione, Paregoricum, quem in promptu esse jusseram, cepit Ha-

C 2

stum,

stum, qui placidissimum allexit Somnum. Ad proximam Meridiem me revisit Pharmacopaeus, deque Salute Aegri Fiduciam ipsius temere jactitavit, ex eo quod Symptomatis omnibus periculosioribus immunis manifestim remisit & intermisit Febris. Quocirca *Electuarium Peruvianum* solito More sumendum & *Catharsin* tertiis Diebus repetendam mandavi. Formulas vero praescribendi mihi solennes ad Nauseam usque non recenseo. Hisce vero & omnibus absque aliis Adminiculis Vires Aegro instaurantur, intraque Dierum plus minus duodecim Spatium perfecte convaluit. An vero Corticis Peruviani Usui, an repetitae Purgationi, an vero utrisque mutuo conspirantibus fit referenda Sanitas, quem penes est, dijudicet.

HISTORIA



HISTORIA 5^{ta}.

AD Infantulam sex fere Mensium, iniquâ & dura Lege subnatam (quippe cujus Matrem Utero gravem Febre intermittente afflictam curaveram) me accersivit Nutrix, retulitque se observasse eam Aestu & Convulsionibus periodice corripi, & ex iisdem tunc temporis correptam tantum non mortuam esse — Ad Meridiem primo invisi & in hunc Modum praescriptum est;

UT Infantula quamprimum in Aquâ & Lacte commixtis & tepefactis ad Horae quadrantem immergeretur; Dein ut admotis Venis temporalibus Hirudinibus flueret Sanguis ad ʒij. His peractis manifestum & mirum in Modum recreata ad Somnum se composuit; Mane proximo Rheī gr. iiij. sumenda dedi, quae Alvum debito strictiorem bis terve deposuere.

posuere; per totum Diem parum vel nihil Aestus observavimus. Sed ne Reditus tam tenerae Aetatis Infantulam in vitae Discrimen conjiceret, ad praecavendum sic progressum est.

℞ *Pulv. Peru* ʒj.

Cort. Granat. ʒss. coque in

Aq. font. q. S. ad Colaturae ʒiiij &

Adde Conf. Fracast. ʒj. M.

F. Enema bis in Die mane & vesperi (ⁱ in dextrum latus decumbenti) leniter injiciendum & ad sex Vices repetendum.

℞ *Pulv. Peru* ʒss. *Terebinth.* q s. F.

Emplastra Carpis & Suris tepide applicanda & alternis Diebus renovanda—Hac Methodo intra Septimanam bene se habuit.

PRAEDICTIS subjungam Observationem nostris Geminam, quam mihi nuper, cum de hac curandi Methodo cum eo Sermonem habui, communicavit Vir in Arte Chirurgicâ peritissimus.

(a) N. B. Cautionem in Clysteribus adhibendis apprime necessariam, Rationis ignarus consulat *Hildan. Observ. Chir.* 77. Cent. 1.

FOEMI-

FOEMINAE cujusdam Febre tertiana laborantis Curam habuit, cui Corticem ad ℥iiij. sumendum dedit; iniquis tamen (proh Dolor!) Auspiciis, Febris enim Paroxysmus eadem Facie, eodem Calore, & iisdem omnibus Symptomatis ad easdem Periodos revertebatur. Incertus quid agat, tandem Unciam quintam deglutiendam dedit, quae quidem ultra illius Spem & Opinionem, sed in Aegri Commodum & Salutem decies & amplius Ventrem deiecit; Ex quo sensim decrevit & intra Septimanam ex Integro discessit Febris.

DE cujus quidem Facti Veritate Hominiſque Fide nullus dubito; praeterea quod me Usus saepe docuit, palam eloqui ac etiam propugnare non verebor. Tantum abest ut Cortex vel Damni vel Inefficaciae merito incusetur, ex eo quod primis ab assumptis Dosis superveniat interdum Diarrhaea, ut post Fluxum cohibitum ex mediocri & minori, quam solet, Quantitate Curatio exinde saepe, ne dicam semper, reddatur facilior & certior.

SED ut eo Revertar unde digressus sum data Febris Remissione, immo etiam urgente Febre

Febre, ubi diutius inhaeserit nec integra aliqua intervenerit Crisis, *Potionis Catharticae* plus minus pro Ratione Aetatis vel Idiosyncrasiae & alternis diebus ad duas vel tres Vices cum Haustu Paregorico repetendum praescribo: Et hac sola Methodo Res aegri magis magisque indies in Tuto collocabitur; seu saltem Medico praebebit Ansam, qua Opportunius & certius Corticis Usu Morbum feriat & confodiat.

ET quisnam est obsecro qui Medicinam vel primis labris gustasse prae se fert, cui non in proclivi est hujusce Praxeos Rationem reddere?

QUISNAM, qui in Arte Anatomicâ vel minimum versatus (cujus qui ignarus est in Morbis quibuscunque curandis dubio errat Tramite & Filo incerto ducitur) qui Intestinarum & Glandularum Situm, Fabricam & Usus vel parum novit, non facile perspiciet Catharticis non modo Ventriculum Cruditatibus expurgari; Ductus Biliofos & Pancreaticos ad Chylum rite elaborandum necessarios referari; Renum, Ureterum, & Vesicae Vias mundari; Intestina tam crassa quam tenuia Stercore ob-
fita

fit a bene liberari; non tantum Ora Lacteorum Saburra obliterata aperiri, Glandulas Peyterianas & Lymphaticas omnes a Crassis & Glutinosiis Humoribus, quibus saepe Obstrui solent, abstergi; non modo primas purgari Vias, crudaeque Materiae Redundantiam minui: Sed & ipsas Medicamenti Particulas in Sanguinem sese insinuare & exinde Lentos attenuari, Viscidos incidi Humores, ita ut liberior sit intra Vasa Circuitus, & si quid superfluum sit per Cutim diffluat; si quid in Arterioliis haeserit in Venas trajici queat. Viis omnibus & Canalibus reclusis & expurgatis ut consueti Spiritibus & Sanguini meabiles pateant Aditus & ut utrisque sua firme instauretur Crasis.

SED ad Praxin revertamur. Dietam quod spectat & Regimen paucis dicendum; non enim opus est ut vel a Potu vel Cibo cohibeatur Aeger; vescatur autem Eduliis Eupeptis & Eulichymis & singulis Partibus Vini quolibet modice utatur; temperet vero sibi ab Usu Olerum & Fructuum qualiumcunque & Liquorum frigidorum; caveatque ne audaciter se Aurae committat, nec prius Sanguis

D

quam

quam pristinas Vires de novo receperit, ne frigidioris Aeris Accessu malum recrudescat.

NON possum autem me continere, quin hic te moneam, quam inanem & perniciosam Operam navant ii, qui Febricitantes more malo immo pessimo Jure vel Injuriâ lecto protinus addicunt, & Anicularum instar, Sudoribus quoquo modo extorquendis, summâ Ope incumbunt: cum ab ipso hoc importuno Molimine, tantum abest ut minuat Febris, ut quae vel sponte sua evanuisset forsan vel faeliciter sese remisisset, Mutata sua Indole & Genio in continuam vel malignam migret: Ex ipso enim lecti Calore & Medicamentis justo calidioribus rapidior fit Sanguinis Circuitus, & proinde Aestus & Spirituum Agitatio magis intenduntur, nec sedari possunt nisi Aeger e Lectulo eximatur; Morbus enim Fraeno potius quam Calcaribus indiget. Vides itaque (Vir Colendissime) *Curationis* Exitum ab ea Ratione quâ in ipso Limine & primis Morbi Diebus Aeger tractetur summopere pendere.

QUIN & inter Monita Verbum adjiciam, in Febris praecipue tractandis, ad Therapeiam
rite

rite instituendam accurate distinguendum est Medico, quaenam sit Aegroti Idiosyncrasia, quaenam Sanguinis Temperies & intima Morbi Indoles.

VARIAM enim (uti cuius Anatomico patet) in diversis Mutationem subit Sanguis: Modo adeo tenuis & nullius fere Firmitatis est, ut Mictum Sanguineum, Dysenteriam, Petechias, aliaque ejus Generis Symptomata inducat; modo crassus adeo & pinguis, ut eliminatis omnibus Particulis Serosis inspissetur & in Solidum exsiccetur, ac proinde invehat Faucium & Linguae Asperitatem, Sitim inexplebilem, Anginam, Anthraces &c. Satis ut opinor tenes quam ex his inter se plane discrepantibus oriuntur Indicationes longe sibi invicem diversae; absit vero Verbis Invidia, si *Mediocris* immo *Magni* Nominis Medicos in hac Re, non semel sed saepius graviter errasse affirmem.

DOLENDUM est sane tam paucos extitisse, qui accuratâ in judicando Faelicitate, erudita in Symptomatis internoscendis Subtilitate, peracri in Pulsibus & in Urinis Acumine

gaudeant: Haec vere sunt ab ipsis Incunabulis gratuita Naturae Dona, non improbi Laboris, quantumcunque enim Studii accesserit, Medicus non evades, nisi una cum Doctrinâ Vim habeas insitam, nisi & quodammodo Medicus nascaris; etenim si dare Vitam, proprium Dei Munus est, certe datam tueri & jam oppressam pene restaurare aut fugientem retinere Divinae Potestati proximum fateamur oportet. Est enim Ars Medica a Natura tibi credita, non a te inventa, quam accepisti, non quam excogitasti. Tu itaque (Vir eximie) quam a Natura nactus es, Spartam orna, easque Ingenii Dotes locupleta, quae quantum ego Opinione auguror, Decus tibi honestum intaminatamque Gloriam conciliaturae sint. Sed de his satis & fortasse nimis multa.

REDEAMUS itaque unde defleximus & de Corticis Periculo, Incertitudine, & Insalubritate, ulteriùs pergamus, omnemque Rem ita Oculis subjiciamus, ut quae vera sit medendi Methodus & Ratio satis superque evinci possit.

VERUM enimvero (nec diffiteor) Periculum non tam ex ipso Cortice natum esse videtur

detur, quam ex eo quod perperam admini-
 stretur, quod minus opportune Aegro inge-
 ratur; si quidem vel urgente Paroxyſmo, vel
 paulo ante Accessum, vel data tantum Remiſ-
 ſione deglutiatur, ſaepiſſime efficit quo minus
 Materia morbifica ipſâ Naturae Methodo poſ-
 ſit exterminari, quae proinde praeter fas in-
 cluſa Aegrum in ſummum Vitae Discrimen
 conjicit; Sanguis enim fervidior, magisque
 ebulliens in ſuperiora male Impetum facit,
 Spiritus accendit & in Furias agit. Et ex hac
 Materiae Febrili Metaſtaſi in Cerebrum de-
 repente facta, perturbata eſt totius Corporis
 Oeconomia, omnibuſque uſque deque verſis
 non modo triſtiſſima omnium Facies ultra
 conſuetum Morbi Morem inducitur, ſed &
 Morbus jam a ſeipſo alius Symptomatis ſti-
 patur Anomalis.

HISTORIA



HISTORIA.

VIR bonae Stirpis triginta circiter Annos natus, Artuum, Dorsi, & Capitis doloribus, Ventriculi Nausea & Vomitione frequenti, Aestu vehementissimo correptus jacebat. Vesperi Emeticen propinandam dedit Pharmacopola non indoctus, & Nuchae & Brachiis Emplastra Epispastica applicuit & Hora Somni Haustum Paregoricum exhibuit.

Die *Secundo*, Foelicius fere omnia cecidere.

Tertio, Potionem Purgativam & finitâ Operatione Haustum Paregoricum sumendum dedit.

HUCUSQUE recte quidem, rectius vero si vel eandem institisset Viam, vel si in alteram
ram

ram non nisi cunctanter & tardo Pede transiisset.

Quarto, Summo mane (Aegro se melius habenti) Corticis Peruviani ℥ij. cum Decocti ejusdem coch iiij. & secunda quaque Hora repetenda suavit. Proh autem ex Improviso mutatam rerum omnium Faciem! Vesperi ad Horam circiter septimam rediit Cephalalgia & Calor excanduit; Urina prius turbida subito pallida, nec quicquam in ea subsedit.

PULSUS debilis, celer, & non aequis Intervallis motus; ad mediam Noctem aliena Mente locutus est & ante mane totus obstupuit; Rebus sic stantibus, *Quinto*, Emplastra Epispastica Femoribus & Suris internis sedulo apposuit Pharmacopola; his vero nihil respondentibus nec ut ipsi videbatur responsuris, quid faciat, quo se vertat nescius, *Septimo* me in Operam subsidiariam invitabat. Quo tempore urgebat Stupor & per vices Delirium eoque aliquando processit Furor, ut insanum jura-veris, neminem vel Amicorum cognovit, Lecti Fimbrias & Floccos vellicavit, omnibus adstantibus de eo prorsus actum esse ejulantibus in hunc Modum praecepi.

CAPITI

CAPITI raso Emplastrum Epispasticum
& plantis Suppedalia apponenda iussi, &
ut admotis intra Scapulas Cucurbitulis flueret
Sanguis (si commode fieri possit) ad ℥viii.
& ad Interna

Octavo ℞ *Tinct. Hier.* ℥jss.
 Jalap. 3ij.
Syr. e Rham. C. 3vj. *Spt. Lavend.* 3j.

M. F. Potio, partitis vicibus exhibenda donec
Venter semel solvatur.

(NOTATU dignum est (Vir erudite) ad Ca-
tharsin rite instituendam, Medicum scire o-
portere, utrum Aeger facilius an aegrius Me-
dicamentis cedat; Taliter enim Catharsi ce-
lebrata ne quid Aegri Idiosyncrasia Detrimenti
capiat, satis cautum est) post Horas tres ter
quaterve se detrusit Alvus, eoque nescio, a
quo tempore manifestim remisit Mentis Error
& brevi cessavit. *Nono* nil Medicamenti ce-
pit, sed optabilius omnia.

Decimo, Potionem leniorem praescripsi cum
Haustu Paregorico h. S. sumendo & intra Dies
viii. bis repetita Catharsi, rejectis omnibus
aliis

aliis Remediis convaluit, Viresque pristinas brevi obtinuit.

P O S S U M equidem alios huic similes Casus tibi enarrare, sed hunc solum abunde sufficere arbitror, ad evincendum illud summopere cavendum esse, ne Cortex praemature nimis exhibeatur, nec prius Morbus se quam suo Marte parum protriverit; *nisi nimia aegri Debilitas exigat.*

S E D in nulla quam in hac Re magis spectatur Medici Acumen; nemo Medicus vere dici meretur, nisi Pulsuum sagacissimus & Judicio subactō praeditus, nisi qui dubias saepe & fallaces Morborum Notas rite intelligat, quique Remissiones ab Intermissionibus rite & admissim dignoscat, & urgente Necessitate ex labefactatis Aegri viribus, quā Methodo quibusque Cautelis vel in Remissionibus Cortex exhibendus sit, rite novit; ex levissimo enim Errore Febris effertior, Domituque obstinatior efficitur, tandemque uti non raro accidit ipsa Arte redditur immedicabilis.

CAUTUS itaque semper sis in Medicamentis omni Morbo adhibendis, ne in Allucinationem incidas & aberres ab illo Scopo in quem collimat Natura; Artis enim est Naturae adesse non obstare, ejusque Ductum non praecipitare sed sequi.

DE Corticis in Febris nuper grassantibus *Incertitudine* Verbis parum Opus est; Cujusvis enim est in Medicinâ *Operarii* notare, has pro More & ut olim Cortici non cessasse, sed ad incredibilem pene Quantitatem repetitum parum vel nihil profecisse.

AN vero ejus *Inefficaciae* an *corrupti* & *adulterini* passim venditi Vitio vertatur necne, nunc Temporis non est dijudicandi.

Eousque quidem nunc Dierum processit quorundam Astutia, ut Corticem (nescio quem) *Fuco imbutum* pro Peruviano incautis obtrudant; Eousque etiam Impudentiae ventum est, ut vel ipsis aperte fatentibus duplicem habeant Officinam, *veram* alteram & alteram *adulterinam*.

ENIXE vero optandum esset, quippe quod & Artis Honori & Reipublicae Saluti cederet, ut non tantum Pharmacopolae, sed ut Medici qui Ruri Medicinam colunt, in hujusmodi Fraudibus aperiendis & retegendis, in Pharmacis Visu, Tactu, Odore, Sapore, & praesertim omnium *Lance Hydrostaticâ* rite dignoscendis diligentiorum praestarent Operam. Sed ne fidis sim Offendiculo Amicis, me re-
primo & revertor.

UT ut sit, pro certo habeatur, lubricam esse atque Aleae plenam per Corticem Curationem; Quamplurimos enim repetito licet hebdomatim per Annum & amplius Cortice Tertianae vel Quartanae Febri succubuisse, tandemque vel tabidos Mortem obiisse, vel miseram adhuc Vitam trahere. Non paucos vero Curae nostrae mandatos, sanctissimè adfirmo, ab ipsis Fati Faucibus ereptos sospites evasisse & incolumes; & sequenti Methodo.

DATIS bis terve *Cathartici* iisque (si tulerit Aetas & Crasis) valentioribus; ad Reditus praecavendos in hunc vel similem Modum progressum est.

E 2

& Pulv.

℞ Pulv. Peru. el. 3x.

Rad. Rhei 3ij.

Pulv. Cinnam 3ij.

Conf. Fracast SM. 3ij. Syr. e Cort. Aurant.

q. s. M. F. Eleſt.

Cujus capt. ℞. N. M. tertiis Horis (data A-
pyrexia) superbibendo Coch. iiij. sequentis
Apozematis.

℞ Cort. Peru. 3jfs.

Sal. Tart. 3j. Coque repetitis

Vicibus in Aq. font. q. s. ad Colaturae ℥ij.
quam adhuc bullientem affunde super

Rad. Gent. Zedoar. Cassam ā 3jfs.

Coccin. Croc. ā 3j. Cort. Aurant. Winteran. ā 3iiij.

& cum refrikerit, Colaturae adde

Aq. Cinnam. fort.

Vin. Chalyb. ā 3iiij. M.

℞ Elix. Propriet. Helmont. 3vj.

Vitriol. 3ij.

Tinct. Mart. Mynch. 3ij. M. & Capt.

Cochl. parvulum in Haustulo Vini albi bis in
Die, & subinde si visum fuerit.

N E C est cur quenquam subiret mirari me
Rhabarbarum admiscere. Ex Ratione quidem

&

& Experientia crebra mihi constitit Corticem in Febre expugnanda certiolem & efficaciorcm exinde reddi.

S E D ne inhonesto Silentio quae vera sunt, dissimulem, dum apud Medicos Parisienses celeberrimos annis abhinc quatuor versatus, non levi Admiratione observavi, eos decoctis suis Peruvianis Mannam saepe adjecisse; Quantum vero Rhabarbari Usus in his Casibus Mannae praeferendus sit, quisnam est qui non fatebitur?

A D *Insalubritatem* pergamus, quod non ideo dictum velim (Vir ornate) ut intelligas me Corticem prorsus damnaturum, sed ut inter & post ejus Usum debitae Evacuationes rite celebrentur.

V I D E S (nam ubique fere est videre) Febres intermittentes, cum Chronicae evadunt, Viam sternere ad Morbos quamplurimos & curatu difficillimos & post liberum Corticis Usum Aegros variis & inter se diversis tentatos esse Modis.

H I S

HIS nempe Crura & Ventrem Hydropicè intumescere; Illis Tonsillarum & Partium aliarum Dolores, Inflammationes, Abscessus, Gangrenas, immo Ossium Sphacelos; Cephalalgiam, Cardialgiam, Phthisin, Icterus, Rheumatismum; Infantibus Rachitiden; Senibus Diabetem; Foeminis Maniae Speciem; Puerperis nulla non mala accidere.

UNDE vero haec omnia, haec varia & inter se longe diversa? Uni & eidem Causae accepta ferri certus tibi spondeo, (*viz.*) Purgationi vel non omnino vel non rite institutae; Atque eadem est utrobique Curationis Ratio; totius equidem Rei Cardo in evacuantibus & deobstruentibus, in Sanguine & Visceribus corroborandis & firmandis integre & omnino vertitur.

SED vide obsecro unde omnis hic Error Ortum traxerit, reformidant nimirum Vulgus Medicorum, ne instituta Purgatione redeat Febris. Apage vanus ille & insulsus Timor! Si cum aliis rite intercalatis Purgationibus & Diebus a Catharsi vacuis ad Recidivam praecavendam apta & in Ordine exhibeantur Remedia.

dia. Esto vero; quid si postliminio rediret? Annon plus imminet Periculi ab inclusis hic illic depositis Materiae venenosae Reliquiis, quam ab ipsis Febris Paroxyſmis bis terve redeuntibus. Scire vellem quas ob Rationes, depulſis quibus Febribus cunque malignis & inflammatoriis, purgantia praecipiant omnes omnium Gentium Medici, niſi quod quicquid reliquum ſit Materiae exterminare voluerint; Quidni ea de Cauſa, eodem Conſilio in intermittentibus eandem Curationis inſtituam Methodum?

ANNE Gratiae obſecro Medico iſti ſint habendae, qui Febris Paroxyſmos tantum depulſaverit & repullulantem malorum Hydram adhuc domandam reliquerit: qui ab uno Aegrum redemptum mille aliis Hoſtibus inclementioribus vexandum tradiderit? Annon ſatius & levius eſſet ſub ipſa Febre *aegrotasse*, quam ea Lege atque Omine *ſanari*?

SAEPISSIME vero mihi Riſum commovit & Bilem iſta Medicaſtrorum Ignorantia, qui in praedictis Caſibus Aegros tanquam Morbis genuinis laborantes tractant, cum re-

vera

vera non sint Morbi, sed Symptomata, sed Febris male tractatae Reliquiae & inclusae Putredinis Indicia.

ET si quis paululum animadvertat quoties tota Supellex Medica ab istis nequam *Agyrtis* importune & praepostere adhibeatur; quam multa eaque, proh Ignorantiam! pugnancia ad nauseam usque ingerantur Remedia, quibus officiose necant; agnoscat lubens mercenarios hosce Homunciones in aucupanda Gloriola, in Quaestu parando totos esse: Fatebitur multum iis debere *Pharmacopolas*, nihil interim *Aegrotos*.

TE vero rectius (Vir erudite) cui Cordi est ut Medicina in Sedem Honoris & Dignitatis, quam ab antiquo obtinuit, reponatur, talem Te gessurum auguror, qualem nec Gloriolae popularis Captatio, nec dulcis Odor Lucri ab Officio abducatur. Maeste Interim hoc Animo, & Aesculapio lita ut caepisti. Praesta Te fidum Medicum Hominemque humani nihil a te alienum putantem. Aequa semper & hilari Animi Indole & gratuitam egenis ac lucrosam locupletibus Medicinam para,

ra, ut Morbo captus non tantum *Cito*, *Fucunde*, & qua fieri potest *Certitudine* ad Sanitatem restituatur, verum etiam ut se redimat quam queat *Minimo*.

SED e Diverticulo in Viam & ad nostram Curationis Methodum.

MENSE Septembris proxime elapso Viros tres post Febrem intermittentem & a Cortice depulsam, quibus *Cephalalgia Periodica*, *Dolores Rheumatici*, *Venter Hydropicus*, *Facies IctERICA*, eadem fere Methodo tractavi & intra Mensem sanos dimisi; quibus in hunc Modum praescriptum fuerat: Catharsin leniorem bis in Septimana celebrandam esse, Diebus vero a Purgatione liberis

℞ *Cons. Aurant.*

Pulv. Peru. ā 3vj.

Cinnab. Antimon. 3iij.

Antehect. Poterii 3ij

Zinzib. Nuc. Mosch. in India Cond. ā 3j.

Syr. Aurant. q. s. M. F. El..

Cujus capt. ℞. N. M. ter in Die, H. med. superbibendo *Coch. iiij. Infus. sequentis.*

F

℞ *Cons.*

℞ *Cort. Peru.* 3x.

Rad. Rhei.

Helleb. Nigr. ā 3iij.

Sal. Absynth. 3j.

Cinnam. Mac. N. Mosch. Caryophyl. ā 3ss.

contundantur simul in Pulverem crassum & infundantur Vase clauso in B. Arenae per Dies tres in ℥iij. Vini Montani; Per Subsidentiam depuretur Liqueor a Foecibus & filtretur.

QUINETIAM quo magis in tuto collocaretur Aeger, ad ipsas Materiae febrilis Reliquias averruncandas & radicitus extirpandas, vel in Brachiorum vel Crurum alterutro Fontanel-
lam incidendam esse jussi.

QUID amplius, nisi ut Curationi Coronidem imponam & Infirmitati Virium subveniam? Caeteris vero omnibus aliis Remediis quae ad Sanguinem exaltandum, Spiritus refo-cillandos & Firmitatem Partibus conciliandam faciunt, (uti crebrior Experientia edocuit) facile Palmam praeripit *Vinum Viperinum* quod est hujusmodi;

℞ *Vipe-*

℞ *Viperas Foemellas viv.* N°. x.
Limatur. Chalyb. ℥ij.
Succ. Aurant. N°. vj.
Nuc. Mosch. Cinnam. ā ℥jss.
Vin. Hispan. ℔x. Digere in B. A. per
 Dies xij, & filtrati Liqueoris Capt. ℥ij. bis
 terve in Die.

DE *Phthisi* vero (Vir dignissime) sine ex-
 orem te mihi hanc Veniam paucula subnect-
 endi, nec sane diversus abeo, utpote te minime
 latet, quam plurimos Febre intermittente vex-
 atos in funestam delabi Tabem. Nec sane mi-
 rum videatur, si, ex ipsa Morbi Indole, ejus-
 que iterata & frequenti Recrudescencia, si ex
 efficacium Medicamentorum tempestive ex-
 hibitorum Neglectu, Calor tandem Hecticus
 accenderetur & continuus evaderet; si cum
 tenera adeo sit Pulmonum Structura, eorum-
 que Parenchyma vesiculosum adeo & spongi-
 osum ac proinde Humorū malignorum prae-
 caeteris susceptivum, Materia febrilis in iis de-
 posita, Tumores, malique Moris Ulcera tan-
 demque Phthisin induceret. Nec minus a-
 nimadvertendum est hujusmodi Aegris Mor-
 bum hunc lethalem fore ne ullam quidem insi-

dere Suspicionem, sed (de more multorum) vel prorsus negligere, vel, quod eo redit, quibusvis infimis *Sciolis* curandum tradere, quo fit ut non raro Diathesin inflammatoriam & venenatam Sanguini & Humoribus concilient, vel ob stupendam eorum Inscitiam pretiosissimi Salutis instaurandae Temporis Dispendium faciunt, Aesculapii Ope vix tandem petitâ, usque dum *Theologum* potius de Animae Salute, quam de Corporis Sanitate *Medicum* consulere conveniat.

HISTORIA



HISTORIA.

AGRICOLA quinquagenarius, Corporis crassi, in Laboribus exercitus, ad sesquiannum fere Febre laboravit intermittente, a qua iterum iterumque ex Usu Corticis repetito pro hac Vice liberatus, incertis tamen Intervallis adhuc recurrente, Medicaminum Palato minus adblandientium pertaesus & Crumenae forsan (*jam satis emunctae*) parcus, nullam Opem vel a Medico vel ab ipso Pharmacopaeo impetrandi tenax, praestolans Veris appropinquantis Adventum, speransque Hostem Sponte suâ tunc Temporis discessurum. Eheu vero! Intra Mensem fractis & attritis viribus Propositi inconsulti suppaenituit, at in pejus omnibus tendentibus ex Amicorum Suasur ipse fere invitatus me consultum adiit. Quo
Tempore

Tempore *Pulsus* incitatus & debilis, *Sitis* avida, *Appetitus* in totum prostratus, *Dyspnoea*, *Tussis* continua, *Vigiliae* pertinaces, *Sudores* multi & colliquativi, *Facies Hippocratica*, *totumque Corpus attenuatum*. Investiganti mihi sedulo, quomodo se habuerat Aeger proxime elapsis sex septemve Mensibus, illico persuasum fuit, hanc Phthisin esse veram prioris *Proteoformis* Morbi Sobolem; rejectis ideo Pectoralibus, Antehecticis, Antiphthisicis aliisque omnibus cujuscunque Nominis Remediis, totam Curationem repetitis Catharticis & Electuariis & Decoctis Peruvianis (*Pag.* 13. & 16. & 36. praescriptis) committendam & absolvendam statui; Quo facto nullus dubitarem, quin detracto Fomite, Flamma Hectica Sponte extincta foret una cum tota Phthiseos Symptomatum Turma. Nec quid me fefellit Spes & Fiducia, intra Mensem enim Catharsi licet Hebdomadatim bis repetita mirum in Modum refocillabantur Vires; *Tussis* rarior, *Respiratio* liberalior, *Somnus* placidior, *Pulsus* ad Normam magis compositus, *Vultus* vegetior, *Sitis*, *Orexis*, & *Perspiratio* fere Naturalis, mutatis in melius omnibus, Catharsin semel tantum in Septimana repetendam, Diebus vero

ab

ab eâ vacuis, bis in Die *H. med. Coch. iiij. Infus. Alterativae* (Pag. 42. praescript) exhibenda, & Fontanellam duorum triumve Pisorum capacem incidendam imperavi. Tribus circiter elapsis Hebdomadis a Symptomate quocunque molesto prorsus liberatus integre revalescebat, ac si nunquam decubuiſſet.

ALIORUM equidem (Vir erudite) sub iisdem fere Symptomatis nuper decumbentium, qui ab ipsis Fati Faucibus erepti, hac ipsâ Methodo evasere, & ad hunc usque Diem solitis suis funguntur Muniis, Historias speciatim recensere longum esset & supervacaneum.

SED quid audio? Quid objicis? *Nova haec & incomperta* est & non medendi Methodus *vulgata*; *Inaudita* est, *ante, inter & post* Corticis Usum Purgatio. Malleſne ergo (uti *Massarias*) cum *Galeno* errare quam cum Recentioribus vera sentire? Morem mihi obtendis; Renuo, nullius enim cujuscunque Magistri in Verba juro; Praecedaneum sequi Pecudum est, non Hominum. Sed si tantum apud te valeat Medicinae *Procerum* Autoritas;

ADEAS.

ADEAS Sydenhamum, qui unus instar omnium de Febribus scripsit, a quo tibi manifestum constabit, illum ipsum eandem quam nos medendi Methodum Instituisse.

(a) TUM ex Laudabilis in Urina Separationis Signis tum etiam ex manifesta omnium Symptomatum Remissione, percipio tempestivum esse Potionem Purgantem exhibere, quae Sedimentum e praegressa Fermentatione hic illic depositum subducat; quod nisi tempestive factum fuerit, Periculum est ne in Sanguinis Massam remigret, ejusdemque Febris recidivam conciliet; vel etiam sua in Partibus Naturalibus, ad quas amandatum fuit, Mora, in Mineram tenacium deinceps in Corpore maiorum feracem abeat.—Et sane is non multum a Veritatis Scopo aberraverit qui affirmaret ab hoc Capite (purgandi scilicet post Febres Autumnales Omissione) plurimum Morborum Colluviem quam ab ullo alio quo demum cunque Causarum Fonte dependere.

(b) SUBLATO Morbo aeger sedulo purgandus est: incredibile enim dictu, quanta Morborum Vis ex Purgationis Defectu post Febres Autumnales subnascatur; Miror autem hoc a Medicis

(a) Pag. 64, 65.

(b) Pag. 97.

minus

minus caveri minus & admoneri. — Omissa enim Purgatione certo praedicere potui, Morbum aliquem periculosum postea adoriturum, de quo illi nondum somniaverunt.

(a) DE Feb. Intermittentibus. Mense post Morbum depulsum effluxo; Potionem aliquam ex Lenitivis vulgaribus praescribo, atque eandem semel in Septimana ad Menses duos tresve subsequentes repetendam impero; addito etiam singulis Vicibus Haustulo aliquo Paregorico Hora Somni assumendo finita Catharsis Operatione.

(b) DE Rheumatismo] Illi qui longum & repetitum Corticis Peruviani Usus experti sunt Rheumatismo Scorbuto sunt obnoxii.

Ex hisce Luce clarius constat, illum ipsum vel Corticis Insalubritatem indigitasse, seu saltem post ejus Usus Cathartici Alvi subinde ejiciendae Necessitatem plane indicasse.

SED quo de hac Re certiore te faciam Consulas Baglivium, Medicum vere magnum, qui pleno Ore totidemque Verbis Corticem

(a) Pag. 98.

(b) Pag. 278.

G

incusat

incusat Obstructionum Mesaraicarum incurabilem & Februm Hecticarum, nisi Corpus & Remedia Ordine dato rite praeparentur.

DE Fibra (a) Motrice] *Faelicem Aegrum, qui inciderit in Medicum Febres Morbosque Mesenterii bene curantem: Tyrones mei, non Testaceis, non pessimo sane ac pestifero Chinae Chinae Abusu—non &c.—eas curabitis, sed solida nimium intenta laxando, nimium laxata intendendo, liquida nimium concreta solvendo ac per Intervals purgando, intus & extra varia Remedia adhibendo: Qui haec bene noverit bene curare noverit.*

DE Fibra (b) Motrice] *In Pueris & opipare viventibus maxime desinebant in Hecticam, praesertim si praescribatur damnabilis Usus Chinae Chinae.*

DE Praxi (c) Medica] *China China est Remedium Herculeum in Curatione intermittientium, dummodo tamen non detur, si aderit Suspicio Inflammationis alicujus Visceris—nam in talibus*

(a) Baglivi. Pag. 103. Edit. Ultrajecti. 1703.

(b) ——— Pag. 148.

(c) ——— Pag. 165. Edit. Lugdun. Batav. 1700.

Casibus non tollit sed auget Febrem, omnemque morbosam Materiam in affectum Locum deponendo ac figendo, Inflammationes lethales ac demum Gangrenam producit.

UTILIS est in intermittentibus, dummodo tamen non praescribatur in Principio earundem, crudis adhuc existentibus Humoribus, interdum namque Febrem non tollit, & si tollit, paucis Diebus interpositis denuo redintegrat; Et quod his pejus est, novos Morbos frequenter producit, Asthmata, Hydropes, Dysenterias. Rheumatismum, Suppressionem Evacuationum consuetarum, &c.

ALIOS etiam proferre possim sed in his enumerandis & transcribendis ulterius immorari nec vacat nec lubet.

PRAEDICTIS vero Verbum tantum addam, quo Testes in hac Re quam maxime idoneos appello, (viz.) Artis Chirurgicae peritos, quos quidem insalutatos praeterire Nefas esset, quos (Vir erudite) utpote ad humanae Salutis Conservationem pene dixerim utilissimos, quorumque Munus eximium ut summo Honore & Amore indefinenter prosequaris, te sedulus moneo, quorum etiam ex Consuetudine,

Monitis & Observationibus saluberrimis te Penum proprium locupletaturum certus tibi polliceor.

Hos inquam rogatos velim, quot & quantas quamque funestas nuperrime Tragoedias egit Febris; quot exinde ortae sint Inflammationes, Abscessus, Gangrenae, Sphaceli-que Tractatu difficillimi. Quisnam vero est qui non credat, his omnibus Purgationes rite inter Corticis Usus intercalatas vel occurrisse, vel Curationem leviolem effecisse.

Quo vero lucidius, quae dixi, pateant omnia, liceat mihi Morbi Cursus paucis praemonstrare; Prima ab ejus Invasione, id Negotii impendit Natura, ut Canales obstructos aperiat, & meabiles efficiat, Humores diluat, attenuet & fluidos reddat, quo facilius Ope Sudoris Particulae sibi inimicae ejicerentur. Quo Tempore & dum id struit & molitur, constat Seditio & perturbato Sanguinis Statu Febris ut accedat, necesse est; Unde forsan reſeratis Obstructionibus, & Humoribus rarefactis tum facilius fit per Poros Secretio, tum Velocitate aucta etiam uberius; nec
quid

quid Opus est viso aut cauto ad Curationem absolvendam, nisi ut *Solidis Partibus* Tonum suum & Vim elasticam reddamus. Cum vero subacta Natura vel ex Humorū Visciditate vel Meatibus cuticularibus nimium Fœculentiis obstipatis, Materiam sibi noxiam exterminare nequeat, ut prius in *Fluidis* ita deinceps in *Solidis* id quod superest Tragoediae peragitur. Et sicuti Natura aliae ignara est Methodi morbificam in Sanguine Materiam despumandi, nisi allecta sit Febris; ita etiam Massam carneam, nisi facto Apostemate, omni extraneo subducendi est nescia. Succedunt itaque Pus & Vomica, quo facto fieri non potest, quin aliquid ex illa Apostematis Coluvie in Massam Sanguinis per Venas circulari Motu reducti resorbeatur, sin vero Sanies ista ex Apostematis sentina profecta, nimia Copia Sanguini ingeratur, non tantum Febrē accersit, cui Aegri vires sunt impares, sed continuo Diluvio omnem ejus Massam Putredine inquinat, donec tandem & a Febre & Veneno intus delitescēte diutius attritus & lacessitus, Gangrena tandem horrenda Sphaceloque exesus ab Habitu Corporis, velut e perenni Fonte scaturienti, de vivis tollatur Aeger.

SED

Sed ut Epistolae sit Modus, in his & huiusmodi Febribus praesens ab *evacuantibus* Subsidium est & Auxilium; ea autem evacuandi Via quae per Alvum fit, non modo *tutius* sed & *jucundius* a Mortis Discrimine liberat, longamque etiam Malorum Congeriem, quae succrescere solet, quibuscumque aliis Remediis *Faelicius* & *certius* dimovebit.

Si quae vero supra memorata vel *Imi* vel *Superioris* Ordinis Medicis non arrideant, nobis nil refert; sciant enim & meminerint in promptu esse aegrotantium Catalogum, qui ex adversissima, optima jam fruuntur Valetudine, qui Suffragiis suis Processus nostri Fidem firmare, stabilire possint & velint.

SPECULENTUR ii quibus Animo & Otio est; norint tamen nos de aliorum Plausu minus sollicitos, de Re ipsa tam ex Experientia quam Ratione certos esse. Nobis satis & abunde erit mederi, & Rem *Facto non fucato* evincere.

MIHI quidem (si aperte dicam) adeo faelicitate & ex Voto cessit haec (si velis incomperata) medendi Via, ut Humani Generis interesse putem, ut Epistola haec publici Juris fiat, ideoque cum satis evolveris, mihi remittas & Praelo mandabitur.

SCRIPTIS



SCRIPTIS Literis & tantum non obsignatis, in Memoriam revoco me Sponsione tractandi Variolas decedere: Spes vero subest (Vir erudite) me excusatum te libenter habiturum, cum recordaveris dominum *Richardum Meadium* Medicorum Doctissimum totam a Carceribus ad Metam curandi Methodum nobis perhumane promississe. Non equidem mihi leve Gaudium, immo Exultatio fuit integerimi Viri obstinata Fides, cujus Dictis diffidere tantum esset Piaculi, quantum nobis esset Ineptiae, in eadem Re aliquid moliri. Peccarem & merito Audaciae postulandus essem si de Variolis aliquid effutirem, quas ad edomandas Vir tantus, tot tantisque Naturae Dotibus praeditus, tam longa & repetita Experimentiâ instructus, Observationes suas, accuratamque tractandi Rationem Publico impertire spondet. Dii faciant ergo ne mutet Factum, impendantque Vitam tam charam Patriae; Quas enim.

enim Strages ab hoc impatibili Morbo passa est Gens humana? In quantam vero Spem sub Auspiciis ejus Studiisque secundis ingreditur? nec sane immerito; nulli unquam enim Ingenii faelicior Proventus, Doctrinae uberior Seges, nusquam magis sollicitus erga Homines Amor.

LICEAT vero salva Reverentia tanti talisque Viri e multis tibi pauca in Antecessum dare. Te monitum, te cautum velim, ne ex Invasione Morbi *Emeticen*, nisi pareatur Necessitati, *temere* propinandam exhibeas, ne inani Spe Materiae Variolosae inde minuendae, aliisque Medicamentis Viae sternendae Specie ductus & illusus Morbum periculosiorem efficias.

1^{mo}. Ne *nimum Sanguini assurgat Ebullitio*.

2^{do}. Ne *Pustularum Eruptio nimis praecipitetur*.

3^{tio}. Ne *superiora versus (viz.) Stomachum, Asperam Arteriam, Pulmones, Faciem, Oculos & Cerebri Meninges*, major uberiorque, quam par est, *Materiae Quantitas* deferatur. Dudum equidem ab ipsâ Morbi Indole, ab Emetices Operatione, ex ipsâ Ventriculi, Partiumque vicinarum Structura, & de iis habita Mechanica Ratione,

tione, necnon Experientia multiplici animadverti Praxin hanc nimis popularem *Plurimis* fuisse funestam, *Plerisque* noxiam, atque *Omnibus* fere dubiam.

QUINETIAM accedente vel urgente Febre Secundaria, admoneo te, ut semper, praefertim vero *Vesperis* te sedulum vigilemque praestares Medicum, quas in te semper intellexi Virtutes, quibusque ornatum in Casibus etiam arduis, ex *Venaesectione Catharsique* rite & tempestive celebratis te Plurimos ab infansto Fato erepturum esse fidenter auguror.

S.E.D. quo me Fervor Calami & Stili Aestus invitum abripit? Maxime esset optandum (Vir ornatissime) ut ea quae de Variolis a *Viro eruditissimo* sunt elucubrata, ad Umbilicum brevi perducantur; quo certius vero citiusque nobis ea legendi exoptata esset Copia, Tibi bonisque omnibus in Votis semper sit, ut sanus Ille vivat, *serusque in Coelum redeat*; pergatque Medicos omnes *Comitate sua* demereri, *Artem ingenio* excolere, *Artisque Dignitatem sui Nominis Celebritate* tueri, *Utraque collustrare & perennitati consecrare.*

H.

S. I.

Si quid (Vir erudite) notatu dignum in
 Studiis, si quid *insoliti* vel *inexplorati* in La-
 boribus tuis *Anatomicis* adverteris, candide ut
 impertias, rogo; Tractatum enim nostrum,
 quem nupero Anno edere proposui, quemque
 indies politius orno & limo, ut primum
Typographi Sumptibus satis cautum erit, in Lu-
 cem emittere mihi certum est & decretum.
 Valeas & amare pergas me

Dat. Villâ Faustini

Die Decembr. 6to.

1728.

Tui Semper Amantissimum

MARTINUM WARREN.